

**Yang di-Pertuan Agong bangga UiTM pertahan falsafah penubuhan  
Utusan Online  
25 November, 2012**

SHAH ALAM 24 Nov. - Yang di-Pertuan Agong, Tuanku Abdul Halim Muad'zam Shah merakamkan rasa bangga kerana Universiti Teknologi Mara (UiTM) masih terus mempertahankan falsafah asal penubuhannya untuk memberi peluang kepada kaum bumiputera melanjutkan pelajaran ke peringkat lebih tinggi.

Seri Paduka bertitah, meskipun sudah menjadi universiti terbesar dan tersohor di dalam negara ini, falsafah tersebut tetap tidak dilupakan

Malah sebagai Canselor UiTM, baginda amat berbangga dengan pencapaian dan usaha ke arah meletakkan UiTM di dalam peta dunia.

"Jumlah alumni UiTM sekarang sudah mencecah setengah juta orang. Beta pasti kesemua mereka sedikit sebanyak telah menyumbang kepada negara.

"Dengan jumlah yang begitu ramai, beta berharap mereka akan bersatu padu dalam satu persatuan yang akan menyumbang semula kepada UiTM agar kesinambungan kejayaan universiti (dari segi) kuantiti dan kualitinya," titah Seri Paduka ketika merasmikan Istiadat Konvokesyen Ke-77 UiTM di Dewan Agong Tuanku Canselor di sini hari ini.

Turut berkenan berangkat ke majlis tersebut Raja Permaisuri Agong, Tuanku Haminah.

Hadir sama Naib Canselor UiTM, Datuk Seri Prof. Ir. Dr. Sahol Hamid Abu Bakar dan pro-pro canselor universiti itu.

Istiadat Konvokesyen Ke-77 UiTM menyaksikan 27,626 graduan akan menerima diploma dan ijazah masing-masing dengan 22 sidang diadakan di kampus induk Shah Alam, enam sidang di UiTM Perlis, UiTM Terengganu (lima sidang) dan tiga sidang masing-masing di UiTM Perak dan Sarawak.

Seramai 14,027 graduan akan menerima diploma, ijazah sarjana muda (12,446), diploma lepasan ijazah (27), ijazah profesional (152), ijazah sarjana (927) dan ijazah doktor falsafah (27).

Seri Paduka turut menyeru agar semua pihak mempertingkatkan momentum kerjasama antarabangsa yang berimpak tinggi bagi membolehkan nama universiti dan negara dipandang mulia serta dihormati.

Seri Paduka yang mengalu-alukan kehadiran Rektor Universiti of Stuttgart, Jerman, Prof. Dr. Ing. W. Ressel ke negara ini berharap kerjasama UiTM dengan University of Stuttgart dengan universiti-universiti luar negara yang lain dalam menubuhkan Pusat Penyelidikan Kawalan Banjir dapat memberikan manfaat besar kepada rakyat dan negara ini.

"Sukacita beta berpesan kepada hadirin sekalian terutamanya para graduan agar sentiasa berbudi bahasa dan bersopan santun. Sayangilah ibu bapa dan hormatilah orang tua. Inilah nilai budi pekerti budaya kita yang halus lagi tinggi dan ia tidak boleh dilupakan, dipinggirkan atau diketepikan serta taatlah perintah agama, (dengan itu) insya-Allah kita akan berjaya," titah Seri Paduka.

Hakcipta Terpelihara © UTUSAN MELAYU (M) BERHAD

Source: [http://www.utusan.com.my/utusan/Dalam\\_Negeri/20121125/dn\\_03/Yang-di-Pertuan-Agong-bangga-UiTM-pertahan-falsafah-penubuhan](http://www.utusan.com.my/utusan/Dalam_Negeri/20121125/dn_03/Yang-di-Pertuan-Agong-bangga-UiTM-pertahan-falsafah-penubuhan)